

•sanjvwnz•

Mboenjmeng

瓷 罐

□ Yiz Ciz / 余执

Gou yaek fatcaiz lo.

Ndaw ranz gou miz aen mboenjmeng ndeu, aen mboenj neix luenz-lulu, wenjmyagmyag ndaej ingj raen ngauez vunz, gwnz fa mboenj caeuq gwnz ndang mboenj veh rim mbawfaex caeuq djuva, raizrwdrwd, siensaksak, ndeiyawj dangqmaz. Miz baengzyoux naeuz, aen mboenj neix dwg doxgaiq ciuhgonq, dij cienz lo.

Baengzyoux dawz duzsiengq aen mboenjmeng neix fat hwnj vangj bae, mbouj geij nanz couh miz vunz dwk dienhvah daeuq hawj gou, naeuz aen mboenj neix dij samcib fanh maenz, cam gou gai mbouj gai.

Gou gig doeksaet, dawz aen mboenjmeng okdaeuq lumhlumh, fan gwnz fan laj, yawj bae yawj dauq. Aen mboenjmeng neix gou mbouj dawz haeuq da, cuengq youq gak rug, geijlai ndwen mbouj lah saek baez, gwnz mboenj uq rim foenx, bouxlazwz rox baenzneix dij cienz?

Gou mad gij foenx gwnz mboenjmeng bae, aen mboenj bienq ndaej moqsaksak, gag naemj: Aen mboenj neix lauhei q caen dij samcib fanh roxnaeuz engq lai dem dahraix bw!

Baezneix gou mbouj caiq yawj aen mboenj neix mbouj hwnj da lo, gou dawz aen mboenj cuengq daengz ndaw gvih saw bae, ngoenzngoenz yawj geij da, ngoenzngoenz uet geij baez, ndeindei hoh hwnjdaeuq.

Ngoenz ndeu, miz mehmbwk he dwk dienhvah hawj gou, naeuz de dwg aen gunghsw h Baekging, cienmonz bang vunz guh gij hong doxgaiq gaeuqgeq gaicawx, de naeuz gaenh geij ngoenz youq Sanghaij miz aen hoilh doxgaiq ciuhgeq gaicawx ndeu, cam gou bae mbouj bae camgya.

Gou gag naemj, gou caeuq Sanghaij doxliz geij cien leix loh, baenzlawz bae ndaej, couh dwg bae ndaej gou hix mbouj bae.

Gou naeuz gou mbouj bae lo, aen mboenj neix hix mbouj rox caen dij geijlai ngaenz, daengz Sanghaij bae,

vunz baez yawj mbouj dij ngaenz, gou couh beg feiq simgei lo. Danghnaeuz miz vunz caen daengz ranz daeuq yawj, miz sim naemj cawx, mbouj gangj samcib fanh maenz, gai ndaej sam haj cien maenz gou hix sim'onj.

Yaek miz saeh daeuq daengz, dangj hix dangj mbouj ndaej. Mehmbwk haenx youh dwk dienhvah hawj gou, naeuz gvaq geij ngoenz dem de couh daiq vunz daengz ranz gou daeuq yawj aen mboenjmeng neix, lij naeuz danghnaeuz dwg caen couh caeuq gou ganggyaq, baenzlawz hix aen cawx aen mboenj neix.

Gou baez dingq, doeksaet youh miz di vueng lo, ndawsim fanfoek hwnjdaeuq, aen mboenj neix gou hab mbouj hab gai? Aen mboenj neix gou baenzlawz hix mbouj ndaej gai!

Daihgya mbouj rox, aen mboenj neix dwg vunz soengq hawj gou, mbouj dwg aen duh gou.

Saehcingz dwg baenzneix.

Hawsaen dwg aen haw gaeuqgeq vang youq gwnz bien Dahyoudyangh ndeu, miz Gaicingq, Gaivangz, Gaihak caeuq Gaidoeng sei q diuz gai. Dingqnaeuz daj gaxgonq daengz seizneix, Hawsaen couh dwg aen haw hwngvuengh ndeu.

Gaxgoenq mbouj miz goengloh, mbouj miz ci baedauq, gag boux hwnjroengz baedauq cungj dwg naengh ruz, bouxguh seng'ei q, boux daeuq youzlangh, boux deuz caeg deuz bing cungj naengh ruz comz daengz Hawsaen daeuq, hawj Hawsaen nauhyied hwnjdaeuq, seng'ei q hix hoenghwdwd. Miz haujlai vunz diegrog daengz Hawsaen le, couh youq Hawsaen youq roengzdaeuq, aeu yah seng lwg, Hawsaen bienqbaenz maz singq cungj miz. Hawsaen vunz mbouj lai, hoeng couh miz singq Leiz, singq Gungj, singq Yauz daengj samcib geij aen singq, cabyouq Bouxgun, Bouxcuengh, Bouxmohlauj daengj lai minzcuz.

Seizneix, gwnzgai Hawsaen lij

miz geij aen ranz ciuhgeq, gij ranz gaeuqgeq neix aeu cien ndaem caep ciengz, vax nding hoemq gwnz, dingj ranz sei q gak gaeu soemlitlit, gwnz yiemhranz deu lungz veh fungh, ndeiyawj raixcaix.

Geijcib bi gaxgonq, hungzcizginh daengz Hawsaen daeuq caeuq vunzdig doxhoenx gvaq. Vihliux raiz ndei aen gojgaeq neix, gou couh daengz Hawsaen bae, dajsuenq ra vunz camcam gij goj neix. Gyoengq bouxcuz mbouj miz vunz rox gienh saeh neix, aeu ra bouxgeq he cij ndaej.

Gou daeuq daengz Hawsaen, miz vunz heuh gou bae ra naihlau ndeu, naeuz naihlau haenx ndaej goujcib lai bi lo, dwg aen haw neix boux nienzgeij cei q geq he, naeuz de rox gij goj gaxgonq lai.

Naihlau heuhguh Cangh Caijlenz, de byoemgyaeuq haumiegmieg, hwet miz di gaeuz, raen gou haeuq ranz daeuq, de muengz aeu daengq hawj gou naengh, de rwz mbouj nuk, da mbouj fangz, heuh gou naengh roengz le, de couh mbouj dingz mbouj duenh lwnh goj hwnjdaeuq.

Naihlau naeuz caet cib lai bi gaxgonq, de ndaej cibcaet bi seiz hungzginh couh youq geij goengqbya liz Hawsaen mbouj geij gya haenx caeuq vunzdig doxhoenx, de caeuq gyoengq bouxcuz gwnzhaw couh bae bang hungzginh guh saeh, gyoengq bouxsai bae ram bouxdengsieng, gyoengq mehmbwk couh bang dajcawj. Daxboh naihlau guh seng'ei q, ndawranz miz di ngaenz, mwh hungzginh caeuq vunzdig doxhoenx, gij gwn gij yungh gig noix, de couh caemh daxboh aeu ngaenz bae cawx byaek cawx haeux soengq hawj hungzginh.

Naihlau seng dahlwg bihaenx, bouxgvan de okbae guh seng'ei q couh mbouj dauqma gvaq, daengz seizneix hix mbouj rox de youq gizlawz, mbouj rox de dai bae roxnaeuz lij lix. Dahlwg bae haq le, naihlau couh boux ndeu gag gwn gag youq.

Gou raen ndawranz naihlau miz daengmeng, swizmeng, batmeng, mboenjmeng daengj haujlai doxgaiq ciuhgonq, aen swizmeng de cuengq youq gwnz sahfaez haenx, wenjmyigmyig, aen swizmeng neix sei q mienh veh lungz veh fungh, ndeiyawj youh dwggyaez. Gou lumhlumh aen swizmeng, cam naihlau naeuz: "Baj, gai aen swiz neix hawj gou ba, geijlai ngaenz mwngz naeuz."

Naihlau naeuz mbouj ndaej gai, gou youh cam aeu cawx aen daengmeng de, de hix naeuz mbouj gai. Aiq dwg raen gou caen gyaqz gij doxgaiq gaeuq neix, roxnaeuz raen gou cawx mbouj ndaej doeknaiq, de haeuq rug bae, dawz aen mboenjmeng he okdaeuq, naeuz de ndawranz mboenjmeng lai, couh soengq aen neix hawj gou.

Gou cie p aeu aen mboenjmeng, fan gwnz fan laj yawj bae yawj dauq, roxnyinh aen mboenj neix hix mbouj yaez, couh dajsuenq hawj de song bak maenz ngaenz. Gou yaek mbon daeh aeu ngaenz hawj naihlau, naihlau vad fwngz coh gou naeuz de mbouj aeu ngaenz, aeu ngaenz de couh dwg gai mboenj hawj gou lo, de naeuz de dwg soengq hawj gou, soengq hawj.

Gou roxnyinh gig mbouj ndei ei qsei, yaek aeu mbouj dwg, mbouj aeu mbouj dwg, naihlau raen gou yienghsiengq mbouj doengz, naeuz: "Gou geq lo, yungh mbouj daengz gij doxgaiq neix, gou hix cij miz dah lwg ndeu, de hix yungh mbouj daengz baenzlai mboenj, mwngz couh cuengqsim dawz bae ba. Aeu bae coux doxgaiq hix ndaej, aeu bae daengj gwnzdaiz yawj yiengh hix ndaej. Mwngz daeuq ra gou, ngoenzneix raeuz ndaej doxraen, dwg raeuz miz yienzfaenh, aen mboenj neix caeuq mwngz hix miz yienzfaenh. Gij doxgaiq caeuq vunz miz yienzfaenh neix mbouj ndaej aeu daeuq guh gaicawx."

Gou angqvauvau umj aen mboenjmeng dauqbae seiz, baenq gyaq dauqlaeng, raen naihlau gaem faexdwngx ndwn youq bakdou, song da mbouj yaep soengq gou lizbae.

Cien ngeix mbouj daengz fanh ngeix mbouj daengz aen mboenjmeng neix dij baenzlai ngaenz. Gou caiq gingz aen mboenj hwnjdaeuq, yawj bae yawj dauq, mbouj rox aen mboenj neix caen mbouj caen dij ndaej baenzlai ngaenz, hoeng naihlau soengq doxgaiq hawj gou faenh cingzngieih neix, caen dij cienz lai, aen mboenj caiq bengz, baenzlawz gai ndaej?

Gou aeu mbaw sujbaq seuq he caiq uet aen mboenj baez he, dawz mboenj cuengq youq gwnz gyaq, dangguh aen doxgaiq hawj boux haeuq ok yawjngonz ndeu, miz seizgan gou hix lwnh gij goj aen mboenj neix baenzlawz daeuq daengz ranz gou hawj vunz nyi.

Gou muengh aen mboenj neix caen dwg huq caen, caen dwg dij cienz.

Gou muengh naihlau ngoenzngoenz ndangcangq, ndaej gyaq cien bi.